

Kier averigua si enberdad e acusado a ser maltrata CASO ATRACO NA LA FAMA BAZAAR MANDA BEK PA JUEZ COMISARIO

ORANJESTAD(AAN) -- Diabierna tabata e dia stipula pa Juez mr. Behrens, dicta sentencia den e caso penal contra e Colombiano G.S.V., kende ta ser acusa di a comete atraco arma dia 3 di September 1994 na La Fama Bazaar.

Juez te ainda no kier tuma

un decision y a dicidi di manda e caso bek pa Juez Comisario, pa haya mas claridad den e caso.

E punto cu Juez kier haya claridad ta encunto e denuncia di e acusado kende a mostra cu agentenan a maltrata.

E caso aki a worde trata dia

4 di November, caminda G.S.V. a desmenti categoricamente cu el a participa na e atraco aki, caminda a bay cu entre 12 y 13 Mil Florin.

Juez mr. Behrens durante tratamento di e caso a bisa G.S.V. cu e ta desmenti categoricamente cu e no a participa na e atraco pero tin

empleadonan di La Fama Bazaar a reconoce como e atracador. Nan a reconoce na e sicatriz cu e tin na su cara.

Juez a lesa un declaracion di G.S.V., caminda e ta bisa cu el a topa cu un otro Colombiano (Rafa) na Trocadero y akinan a worde splica cu diasabra 3 di September 1994 lo comete e atraco na La Fama Bazaar.

G.S.V. a bisa Juez cu ningun momento el a duna tal declaracion. El a sigui bisa cu el a ser obliga pa firma e declaracion ey pasobra sino e agentenan lo sigui mal-

trate. Segun G.S.V., ademas di tabata dale, e agentenan tabata kime cu sigaria.

Den Corte G.S.V. hasta a duna descripcion di e agentenan policial cu a dale. Ora Juez a puntre, dicon e no a denuncia esaki na Juez Comisario, el a contesta cu

ora e tabata dunando declaracion, un di e agentenan policial a habri e porta y el a dicidi di keda keto.

Fiscal a condena totalmente e atraco aki y a señala cu ultimo añanan atraco arma a aumenta na Aruba y notable ta cu mayoria di nan ta ser cometi pa extranheronan.

E ta haya cu mester impone un castigo pisa y a exigi 4 año di prison kitando e tempo cu G.S.V. a pasa den detencion preventivo.

Envez di a dicta sentencia, Juez a bisa cu e ta manda e caso bek Juez Comisario pa averigua encunto e maltrato di G.S.V. pa agentenan policial.

Awor Juez Comisario lo bay interroga e agentenan policial pa determina si enberdad G.S.V. a worde maltrata of si esaki ta simplemente un storia cu el a formula.

TURISTA AMERICANO ATRACA PA CHOLLER NA SAN NICOLAS

ORANJESTAD (AAN): Tabata casi 5'or di marduga cu a presenta na Warda di Polis, un turista acompaña pa un Choller. E turista di inicial L.P.P. procedente di Merca cu ta hospeda na un High Rise hotel a worde roba. E choller lo a kita entre 400 pa 500 Dollar for di dje.

Esaki a worde confirma pa e choller cu a compaña pa Warda di Polis. Durante di interrogacion e Choller a bisa Polis cu e choller F.R.C. lo a comete e acto y a desaparece. E caso aki lo a tuma lugar banda di un bar den San Nicolas.

Mas laat tambe a presenta na Warda di Polis un otro choller, kende tabata testigo na momento cu e turista tabata worde horta.

Polis a sali enbusca di e Choller ladron, pero no a

topa e sospechoso ningun caminda. Mientras tanto Polis a avisa e turista pa e pasa na despacho di Recherche pa oficialmente entrega su denuncia.

Henter dia Recherche a busca e supuesto Choller F.R.C., pero nan no a logra di localize. Pero mientras anochi no cera, careda di

bina no a caba.

Durante di e buskeda Recherche a logra di pone man riba e choller F.R.C.

El a admiti su culpabilidad y riba dje a worde haya cu solamente 35 Florin den su poder, esta si mester cambia e suma aki na Dollar e ta 20 Dollar cu e lo a resta di e entre otro 4 pa 500 Dollar.

ECLIPSE LUNAR AYERA ANOCHI

ORANJESTAD(AAN): Ayera anochi tabata tin un eclipse lunar cu a cumenza 12.25 y termina 5.02 ora local. Esaki tabata e ultimo eclipse luna di e año aki, y ademas di por a mire na Aruba, el a ser observa na Merca, y Canada, Groenland, Ijsland, Centro America, Sur america, Hawaii, Europa, West Africa y Asia.

Segun informacionnan for di diahuebs a cumenza yobida di meteoritonan y lo dura varios siman. Dia 13 di december e yobida aki lo ta di 3 ora di duracion y dia 22 e lo dura 2 ora.

E MACUTO NAVIDEÑO INDESEA!!!

